

## Die Gsalzene

Wotsch mit dr SBB go raise, muesch vyyl warte  
Warte, warte, warte, nyt als warte  
Und kunsch denn ändligg z'Basel aa wär das jo toll  
Hätsch ni wääg' kabutte WC d'Hoose voll!

S' Greta Thunberg kunnt im 1. Glass Zug ins schwitze  
Wääge Blatzmangel muess si am Boode sitze  
Aber ains hett si zem Drooscht denn schnäll begriffe:  
Bi dr Dytsche Baan kasch weenigschtens go schiffe!

Zum Thema uriniere wämmer no vrzelle:  
Im neie Waggelzug sotsch d'Bysswaar gweerwääg stelle  
Doch dass es das nid bruucht das hämmer schnäll begriffe  
Will wenn de s'Bier verschittisch, muesch gar nid go schiffe

D'Queen hett dr Harry wääge Kindigung vrloore  
Wo dr Charles das heert do flattere ihm d'Oore  
Doch s'Beetli said: «I ha Ersatz, dä kamme bueche:  
Dr Opi Philipp - I muess nur no d'Zeen go sueche.»

Fraue wänn sich no vyyl mee emanzipiere  
Dien am Fraustraiggdaag zämme demonschtriere  
Vo 12 bis 2 wird d'Demo denne underbroche  
Damit si haime kenne zum fir d' Männer koche

Dr Hakan Yakin isch bim Fuessballclub Schaffhuuse  
Und hoolt drzue no Arbeitslosegälder uuse  
Doch was er wiirgglig bruucht das wisse mir genau  
E Halbschlaueentschädigung vo dr IV

Hello CNN - do you me understand?  
My Name is Ueli Muurer – Chief of Switzerland  
I can say nothing to the questions you do stelle  
Because I can in English not a word vrzelle  
I speak a secret language – you must that kapiere  
That you can not emol mit Crypto dechifriere!

Numme alti Männer – das isch ächt e Gwaal  
Steen im Herbst als US-Breesidänt zer Waal  
Mir sinn gspannt, ob die, wo noch dämm Amt dien strääbe  
Dr Waaltermin daatsächlich physisch no erlääbe  
Wie d'Party noch de Waale wird, das isch no ghaim  
Mir tippe uff phirierti Snacks im Pfläägehaim!

### Monschtervärs

Mir Gsalzene – s'isch nid banal  
Sinn als Bangg glyymaneidraal  
Pro Furz dien mir im grosse Ganze  
Jedesmool e Baimli pflanze

Bolitigger – die miest me zwinge  
Pro Furzidee e Baimli z'bringe  
Mit dämm Misch wo die prolete  
Bewaldisch logger 10 Blaaneede!

Goorpse d' Sâi und fuurze d' Kie  
Macht das de Glyymaschitzer Mie  
Drum regiere – s' kunnt no digger  
Bald nur vegani Käärnlibigger

Veganer ässe – sone Drägg  
Unsrem Ässe s'Ässe wägg  
Drumm gitte in unsrer Baiz nyt z'welle  
Do kenne si nur Taxi bstelle

Und sinn Veganer schliessligg doot  
Isch glaar was uff em Graabstal stoot.  
«Er hat – Ihr sollt es alle wissen  
Das letzte Mal ins Gras gebissen.»

En Apropos – drotz Stress mit Glyyma  
Isch eppis fir uns wirgligg prima  
Als Autofaarer simmer froo  
Isch dr Wessels bald nimm doo

Wenn d'Meeresspiegel iberboorde  
Kemme us Holland Flichtlingshooorde  
Dr Voordail hämmer schnäll begriffe  
Die bringe geile Stoff zum kiffe

Das ellai kenntschi aggzeptiere  
Doch wo wotsch d' Woonwääge pharggiere?  
Zem Glygg gitt's Saisonier us Poole  
Die dien se uff em Haimwääg hoole

Ains mien mir - s' wird gschpässig glinge  
noonenool zem Uussdrugg bringe  
Fir uns isch d' Walt wider im Loot  
Will dr Wessels ändligg goot

Schmilzt s' Poolaryys eso wyter  
Wird's au in dr Wieschti schyter  
Denn bsorgt dr Beduin am beschte  
Fir si Kameel e Rettigsweschte

Wenn d' Eskimo Banane pflanze  
Friert's de Pinguin nimm an Ranze  
Drfir sinn d'Yysbääre im Drugg  
Gänn iri Belz freiwillig zrug

Am Nordpool isch e some stolze  
Eskimo si Iglu gschmolze  
S liggd nit am Klima hett är checkd  
Hett s'Glettyyse nid usgsteggd!

Zletscht mien mir gstoo - s'isch zwar nid richtig  
Uns ischs Glyyma nid so wichtig  
Drfir isch's schlichtewägg e Hit  
Dass dr Wessels bald zruggdritt

Die Situation kennt eskaliere  
Wie sotti d' Schwyz druff reagiere?  
S' gitt nur ai Wäg us däre Noot  
Die Gsalzene in Bundesroot!

**Die Gsalzene findsch im Facebook**

Wotsch d Fasnacht mol vo inne gsee - kumm doch zue dr BSG!

[www.schnitzelbangg.ch](http://www.schnitzelbangg.ch)